

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

**Pablo saruhuatasacari
Jesucristoocua tiuujiaa**

1 ¹Janiyari Pabloni. Silvano, Timoteo-
nio, canaari nio naajiya niaacuarani,
puetunu Tesalónica tiacajinia quiniaa
parta Pueyaso pueyarajanaa. Nio
naajioneeri niaara, canapue te pa Que
Pueyaso rupuejacacuajani, pa Jiyaniijia
Jesucristo rupuejacadanio. ²Pa Que
Pueyaso, pa Jiyaniijia Jesucristojuhua,
nojori cuaara nioojia cumaquiiria. Cuaara
nia jiyateera juhuajaniya quijiacaraju-
hua.

**Pueyasoori na tojitianu panyashijiaca
saniitioriquiano Jesucristo
tiuquishacariuhua**

³Cuarta Pueyaso pueyanaa, canaari
jiyanohua nia timitiaani jiyano-
hua Pueyasocua tiuujiaa nia quiniucua
socua, panitiojuaca nia quiniucua
socuajuhua. Cunora, canaa secojosacari
Pueyaso, canaari pueyaracaanu na
sequequiaani, “paacarasho”. ⁴Naa
maninia nia quiniucuatej, canaari
shuquiriaatia poojotaquiaa niajanijini
Pueyaso pueya maapue niquiara
tamaquicua canaa rucanejosacarini.
Canaari nojori poojotaquiaani taa nia
rejeretaquiaa juhuajaniya naquiya nia
miiniuni, taraatia nia miiniujihua,
Pueyasocua tiuujiaa nia quiniucua.

⁵Pueyaso saquiriojonuucua niajanija

pueyaracaanu shuquiriaatia quijiaca nia
quiniuria na shuriucua, cunoori maja
najujuana quiquiaari. Niaacuajaari
seetanujanaa na pueya. Cunoori maatia
niishishiyacuaja juhuajaniya nia rejereta-
sacari naquiya nia miiniu, Pueyasocua
nia tiuuniucua. Pueyaso niishiyashijiaca
pueyari naa naquiya miquiaa niajanija-
tej, Jesucristoocua tiuujiaa nia
quiniucua.

⁶Naajaa, Pueyasocuaari tojetaarucua-
janaa sesa miyashijia. Nojuajaari niaacua
naminiutianiya noo pojori, naquiya
miitijaca niajanijatej. ⁷Niajanija
saniniujia, naquiya mijiosaaquiaarini,
niaari canaata samaraatasaanutaniya-
hua, Jesucristo tiuquishacariuhua pocua.
Jiyacaritij, nojuajaari niquishaanutaniya
mani rimianuqueyano tiuquithuano,
jiyanohua cumaacaraca na seyata
jiyocuaanu. ⁸Tiuquiniutianiuhuari na
saniitionura noo pojori, canapue te
Pueyaso niishiniu panyaquiaani, noo
pojorijihua, pa Jiyaniijia Jesu rupaa
ruuretajacatej. ⁹Puetunu cuno pojorijia-
naari pueyaracaanu saniitosocoriquiano
jiyatesaanutaniya. Nojoriiri tucuaanura
quejoosaanutaniya pa Jiyaniijia
shuriucua. Naacujitij, majaari nojori
niquiniu quiniutianiya na jiquioco,
shacantuua na cumaacanio, nojuaja
jaara mijiria tiuquirohua pa shuquiritia-
nura nojuaja. ¹⁰Jiyacaritij, puetunu na
jeenucuasano pueyajanaari jiyano-
hua na

timitianutaniya. Puetunu nocua tiuujiaa pueyajanaari jiyanhua jiuujiateconutaniya, pa Jiyaniijia na shootiatuacari. Niaari na niquiniutianiyajuhua, nojuajiniji canaa pohuatasanoocua nia tiuuniuucua.

¹¹Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua niajaniya. Canaari niaacuara secojoquiaaaniuhua, Pueyaso cuara nia tucuataniiria na cumaacata puetunu maninia casaa nia miiniu panishanojuanaa. Cuara nia tucuataniiriajuhua puetunu nia miishanojuanaa, cuno, Pueyasooocua nia tiuuniutia nia poonijiosanoni. ¹²Naacujitij, pa Jiyaniijia Jesuuri socua timitiasaanutaniya naa nia miiniuucua maninatej. Naajuhua, nojuajaari nia timitianutaniyahua. Naa maninia quiniutianiyari pa Pueyaso pa Jiyaniijia Jesucristota na cumaquishacari niajaniya.

**Maatia pohuatasano, taate mijiria
quiniutianiyani, pa Jiyaniijia
tiuquishacariuhua**

2 ¹Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetoonutaniya natajaniuhua. ²Canaa sequesano niajaniya nia tojiri, pueyanaa. Majaari nia niyajetanu tariucuacaanu canaa niishitiojosano niajaniya, nia jiyajeneyaquiniuucujia tamasaca sapojosacari niajaniya. Majaari nia shiriiquiniu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasaca jaara naa nia pohuatare, majaari na sequesano tojiniu. Naajuhua, tamasaca jaara naajionuure tamajaaja, niaara na jiyatesocoriquiano juhua canaa naajionee, majaari nojori

tojiniu. Nojoricuajaari nia sapojiya.

³Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyacuishacariuhua, queraatia pueyari Pueyasooocujia pishiniutianiya. Jiyacarijiuhua, Pueyaso rootasano Ruuretajajanaari supenutaniya. Nojuacuajaari tariucua Pueyaso saniitiosocoriquiano na riuriotaca.

⁴Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijiosano nojori pueyasohuara nojori tarinitianurajuhua. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoja tiajinia cajiniutianiyari, Jiyaniijiajanaa cajitiujinia. Jiyacari sequenutaniyari: “Janiyacujiaari Pueyasoni”.

⁵Pueyanaa, ¿majateeri nio nia niishiniucua? Janiyacuajaari nojuajiniji nia poojotajani niaata cua quishacari.

⁶Niaa naasucuaari niishiyacuaja canteeri juhua na quiaajaani, maja juhuanajuaja mijiria na miiniuria tama na panishanojuaaja, Pueyaso paniyaquishacarijia.

⁷Seetanujanaa, Sesaaca cumaacaari tari mijiria poonijiya jiyasohuaja. Naajaa, Pueyaso paracaari juhuanajuaja maja na naata muetanu, pueya niishiniuria nojuaja, na tenujuna cuara niiquiji rishaarejaatijia. ⁸Na tenujuna jaara rishaare niiquiji, jiyacaritij cuno sesaaca sequeeri muetanutaniya, jiyanhua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na noonitua, na shaajanura puetunujuanaa.

⁹Cuno sesa mijia sequeeri muetanutaniya Satanás cumaquishacari nojuaja. Naacujitij, nojuajaari jiyanhua cumaaca jiitianutaniya jiyajeneta casaa

na miiniuria, pueya jiuujiatenura nocuaji. Queraatia niishishoo casaa miiniutianiya-jaarihuaj, pueya na sapojonura.

¹⁰Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniuucua. Nojoriiri maja na tojiniu paniniu quiquiaari seetanu rupaajanaa, Pueyaso jiyanooniuria nojori. ¹¹Naaratej, Pueyasoori nojori tarinitianutaniya nojori sapojosaanura, nojori tiuuniu seetanujuanaa sapojonuunuucua. ¹²Naacuajitij, puetunu noo pojorijianaari saniitisaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucujaca nojori quiniuucua.

**Pueyaso muerasuranoori
tariucuacaanujiniji saquiriojosano**

¹³Niajaniya saniniuuja, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaja, na Sohuanu jataniniuucua niajaniya quiarinio pueya nia quiniuria, seetanu rupaacuajanaa nia tiuuniuucua. Cunora, canaari pueyaracaanu Pueyaso sequequiaa niaacuarani, “paacarasho”. ¹⁴Canaa pohuatasacari Pueyaso rupaa nia niquiara, niaari Jesucristoocua tiuquiaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuaani.

¹⁵Naaratej cuarta Pueyaso pueyanaa, majaari nioojia nia niquijiotenu Pueyasooocuaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano

niajaniyajuahuaj. ¹⁶Jiyanoojia pa Jiyaniijia Jesucristo quiniuucua, pa Que Pueyasojuhuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanoohua maninia miishaanutaniya pueyaracaanuni. ¹⁷Naajuhuj, nojori cuaara nioojia shiniujiiria, maninia nojori tojitiajaca nia quiniuria pueyaracaanu. Nojori cuaara cumaquiiria niajaniya, tojetaarucujanaa maninia nia sequesano quiniuria, nia miishanonio.

**Pueyaso rupaa pohuatanaacuara
pa secojore**

3 ¹Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiqiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari niajaniyacuuaani. ²Canaacuara nia secojorejuhuaj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasoo-cua. Cuno pojoricuajaari canaa paracaajiaca. ³Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niquijiotenura nocuaji. Sesaacaacuaji nia cojuanutaniyajaarihuaj. ⁴Pa Jiyaniijiaa-cua canaa tiuushacari, majaari canaa taacanunu niaa naasucuaari canaa rootasano tojitiaaquiniutianiya. Maja. Niaa naasucuaari na tojitiaacuaja. ⁵Pa Jiyaniijia cuaara niishitiiria nioojiajinia, panijiacua nia quiniuria taa Pueyaso paniyacuuaani. Naajuhuj, cuaara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

Poonijiojuaca pa quiri

⁶Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupenu: taajecorritij, noo pojorijiuhuaj, canaa rootasano tojiyashijiacatej. ⁷Niaacuaajaari niishiya taa quijiaca canaa quiquiaari niaata canaa quishacarini. Naa quijiaca nia quirijiuhuaj. Majaari canaa taajeyaca canaa matanu quijiani. ⁸Majaari najuhua-na canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaajuucani, niucuanio. Canaari naa poonijionuquiaarini canaa panishano canaa jiitianura, maja quenaaja canaa taajetenura nijaniya, maja nia tacaatiana canaajuhuj. ⁹Pueyaso jiyaramiquishano pueya canaa quiniuucua, canaa naata quiquiaaricuaajaari canaa panishano canaa mashiniquiniuria nijaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujua nia quiniuria juhua canaajuhuj. ¹⁰Canaa quishacari niaata jiyacarijuhuaj, canaari nio nia niishitiojoquiaarini: “Cante poonijionu paniaquiyani, cuaara miaqueteshiyaquiriajuhuaj”. ¹¹Canaari pohuatasaarucuaajaanihuaj, noojiaqueya nijaniyajininionaari juhuajaniya quiquiaa. Majanaari na poonijionuunu

quiquiaa. Nojoriniaari noo pojori cushitiojoquiaa, poonijionuujuaa cutaratej. ¹²Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuaara poonijionuura, nojori panishano nojori jiitianura.

¹³Cuarta Pueyaso pueyanaa, teyano nijaniyajinijiniote maninia miijiacacuaani, majaari maninia miiniu nia tarinitianu. ¹⁴Saniniuujia, cante nio naajioneejinia canaa sequesano tojinu paniaquiyani, nojuaja nia niishiri cantenonjoni. Majaari na rupenunonj, na caririquiniuria quenaaja. ¹⁵Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatasaari

¹⁶Poojia cajitijia pa Jiyaniijiani, nojuajanaa cuaara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu nijaniyajanaa.

¹⁷Janiyari Pablóni. Cua saruhuanura nijaniya, janiyari tama cua juaashiquiatajaaja nio naajiyani. Nia niquiri cua naajiosano, taamuecatenonjoni. Janiyari naa puetunu cua naajioneecajanaa tucuatquiaani, cua sesa cua naajionuta. ¹⁸Pa Jiyaniijia Jesucristo cuaara cumaquiiria puetunu nijaniyajanaa. Cuaara naa quiiriatej.